



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikadu Imprensa

Períodu : Marsu 2012

Edisaun : 21 Marsu 2012

**Ministériu Públiku apresenta relatóriu anual 2011 ba PN –
subliña kestaun saláriu ba ofisial justisa no Polítika ba kuadru reforma
kareira**

Iha loron 13 Marsu 2012 Judicial System Monitoring Programme (JSMP) liu husi sub. Unidade Programa Observasaun Parlamentu (POP) hala'ó observasaun konabá apresentasaun infórmasaun ka relatóriu anuál 2011 husi Ministériu Públiku (MP) liu husi Prokuradória Jerál Repúblika (PJR) Sra. Dra. Ana Maria Pessoa iha plenária Parlamentu Nasionál. Apresentasaun informasaun anuál ba Parlamentu ne'ebé hato'ó hodi kumpri artigu 133^o Konstituisaun RDTL no artigu 11^o husi Lei Nú.11/2011 konabá Eestatutu Ministériu Públiku ne'ebé konklui progressu, dezafius no sujestaun ba governu iha prosesu oinsá atu kontinua refórta servisu husi Ministériu Públiku nian.

Iha apresentasaun ne'e, Prokuradóra Jerál da Repúblika Ana Pessoa lamenta liu konabá kuadru pesoál ba servisu apoiu tékniku no administrativu nomós husi sekretária distritál Ministériu Públiku (MP) nian. Tuir Prokuradóra Jerál katak besik tinan rua ona governu seidak aprova kareira no estatutu atu selu saláriu ba ofisial justisa hanesan mós kuadru pesoál ba majistradu MP nian. Nune'é mós konabá kuadru pesoál ba majistratura MP tuir Prokuradóra Jerál da Repúblika katak, iha tinan 2010, sira haruka tiha ona pedidu ba governu atu haree konabá promosaun kareira, ho kategoria saláriu no vensimentu ne'ebé natoon ba prokuradór nain 6 ne'ebé promove ona husi terseira klase ba sigunda klase, maibé la iha resposta husi governu to'o ohin loron.

Ba kestaun ne'e Diretór JSMP Luis de Oliveira afirmá katak, *“ofisial sira ne'ebé haknar an nu'udar ofisial administrasaun no ofisial justisa sira ne'ebé servisu iha instituisaun Ministériu Públiku nu'udar makina estadu iha instituisaun refere. Tanbá ne'e, atu asegura katak ofisial sira ne'e bele servisu ho dedikasaun total, estadu ka governu tenke atu atensaun ba sira nia ben-star.*

Tanbá ne'e JSMP konkorda ho politika Prokuradóra Jerál da Repúblika konabá ezijensia atu aprova proposta kuadru pesoal reforma kareira ne'ebé haruka ona ba governu atu konsidera.

JSMP mós konkorda katak estadu presiza duni haka'as-an atu hametin seitór justisa hodi bele nafatin iha imparsialidade no fó konfiansa ba públiku. Hirak ne'e bele liu-husi meus ne'ebé apropriadu no haktuir prinsípiu fundamental husi sistema jurídiku no promove prátika ne'ebé efikas hodi prevene korupsaun.

Iha Prokuradóra Jerál nia apresentasaun subliña observaun kritiku ida ba komponente estadu tomk konabá realidade sosial ne'ebé la equilibru. Tanbá ne'e Prokuradora Jerál haktuir katak *“laos umanu no nein apropriadu atu ezije administrasaun públika ida ne'ebé la foer bainhira ita selu US\$ 298.00 dolar ba tékniku superior enjeñeiru ka jurista, lisenziadu iha administrasaun públika ka iha área seluk matenek nian, bainhira inflasaun halekar hela iha ita nia rain.*

Tuir Prokuradóra Jerál katak, konsolidasaun MP ne'ebé hahu kedan iha 2009 sei nafatin sai preoridade ba Prokuradór Jerál Repúblika ho objetivu atu hametin Ministériu Públiku nu'udar majistratura autónoma ida ne'ebé ho izensaun no vertikalidade, katak la hakru'uk ba podér polítiku ka podér ekonómiku, bainhira hala'ó defeza ba justisa no direitu.

Iha parte seluk, Prokuradóra mós kestiona konabá mal administrasaun husi ema balun ne'ebé kontinua utiliza regulamentu UNTAET/2000/11 ne'ebé la tuir ona realidade hodi impede dezvoltamentu institusionál inklui prejudika independénsia juíz sira nian. Tuir Prokuradóra Jerál katak, loloos labele admite tan juíz sira atu hakruuk ba diretiva sira husi Prezidente Tribunál Rekursu, inklui fahe prosesu sira iha tribunál distrital hala'o liu hosi fali despaxu juíz Tribunál Rekursu. Tanbá, situaun ne'e fó konsikuensia dala barak hatodan liu juíz nasional duke juíz internasionál sira hodi kontra artigu 171^o husi Estatutu Majistradu Judisiál konabá objetivu distribuisaun nian.

Aleinde ne'e Prokuradóra Jerál mós preokupa ho prosesu rekrutamentu no selesaun iha Sentru Formasaun Judisiariu. Prokuradóra Jerál deklara katak nia rasik mós sente admira ho prosesu rekrutamentu Timór-oan ba kursu formasaun ba majistradu ne'ebé pasa ho kandidatu ne'ebé minimu tebe-tebes no konsidera iha diskriminasaun ba lisenziadu husi Indonezia no husi Timor rasik ho razaun tanbá la hatene lian Portugés. Situaun ne'e tuir Prokuradóra Jerál katak ne'e la refleta política ka komitmentu timorizasaun ba autór judisiáriu ne'ebé estadu defende.

Iha oportunidade ne'e mós nia informa konabá total kazu ne'ebé MP konsege prosesa durante tinan 2011. Iha tinan 2011 prosesu foun tama hamutuk 3.889 aumenta ba 5.055 ne'ebé simu iha 2010 sai total 8.944 no Ministériu Públiku remata ona prosesu hamutuk 4.221 hodi tranzita fali prosesu hamutuk 4.723 ba 2012. Entertantu konabá kazu korupsaun, simu ona kazu foun iha 2011 hamutuk 33 no aumenta ba 35 tanbá 2 simu uluk iha 2010. MP halo tiha ona analiza ba kazu korupsau 68 no husi hirak ne'e remata ona 22 iha ne'ebé 11 halo tiha ona akuzaun no 11 sai arkiva tanbá material indisiária la natoon. Maibé kazu korupsaun sa'e ona 46 iha tinan 2012 iha ne'ebé 15 hala'o hela investigasaun husi Komisaun Anti Korupsaun liu husi delegasaun kompeténsia prokuradór titular ba prosesu nian.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/7295795